



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :



Tir Yimyim



tir_yimyim



tir yimyim

TAPAK 3

Manager Kompany-i Bayern Munich
den tenangzüktepbayanglushi

Punjab-i wheat metsü quintal
1,000 yokogo: UP CM Yogi



VOL. XXIII ISSUE NO. 15 (ADOK 15) DIMAPUR RASEMNÜ (WEDNESDAY) MONGPUTENI (OCTOBER) 22, 2025 ₹ 5.00

Thuingaleng Muivah-i pa tasoyim semdang



Thuingaleng Muivah

semdangtsü.

Arishi küm 91 tain Th. Muivah-i Dimapur nungi helicopter ka ajanga Ukhrul-i aotsü aser idakji home coming programme ka nung adenba sülen par tasoyimi aotsü ta NSCN-IM osang ajanga angazüker.

Th. Muivah-i Somdal village nung blessing ceremony ka nung adentsü aser Pine Torch event tsüklokba nunga shilem agitsü. Iba sülen October 29 nü pa den pa meimertem Senapati-i aotsü.

2010 nung Manipur sorkari Muivah par tasoyimi marudaktsüi noktang aser iba ajanga Nagaland - Manipur arrtsülen mepetmesü adoka nisungtem taküm sama aser aika yirua liasü.

October 10, 2025 nü Th Muivah-i par tasoyim semdangtsü sentong metetdaksüba sülen tang tashi nung iba sentong anema noktaker mali ta osang angazüker.

Dimapur, October 21, 2025 (TYO): NSCN (IM) general secretary Thuingaleng Muivah-i Manipur kübok pa tasoyim Somdal semdangtsü sentong lir.

Thuingaleng Muivah-i Naga linük asoshi bendanga agüja inyaktsü atema küm aika tejakdang pa tasoyim toktsür ao aser October 22 nü Ukhrul district kübok Somdal

NPF President Neiphiu Rio-i putep-shitsü aser ka akümstsü ayongzüker

Kohima, October 21, 2025 (TYO): Naga People's Front (NPF) nung Tir inyaktsü atema Nagaland Chief Minister Neiphiu Rio shimogo.

Mongulbarnü NPF General Convention nung Rio shimba osang metetdakja liasü.

NPF-i September 6 nü Rio dang 2002 nungi 2017 tashi pai anepalua aruba party-i tanaben meyipa arutsü temepishiba ka agütsüba sülen tanü party ana ka kuma loktepogo.

September 12 nü NDPP-i temepishiba onük benoka lemsatop aser October 18 nü general convention alidang NPF den ka kuma lokteptsü mulunga agizük.

Kasa anogo nung Rio ya NPF Legislature Party leader asütsü shim aser tanü NPF General Convention nung pai Tir mapa agizükogo.

Rio-i 1973 küm United Democratic Front nung Youth Wing tir inyak. Iba sülen pai kümsük asem atema NPF Chief Minister aser Lok Sabha nung Member of Parliament kümsük ka inyakogo.

2002 nung pai taoba Congress sorkar nung Home Minister menden ntoktsür tanaben NPF nung aden aser idangji Nagaland People's Front ta melena liasü.

Rio-i anir NPF ajanga assembly election asemen atongtepa takok ngua aruba sülen 2014 nung pai MP ka ama national politic-i meyip. 2017 nung party sasap nung mepetmesü adokba sülen pai

NDPP nung aden aser iba sülen assembly elections agia aruba nung NPF tashimaitba kuma aru.

"Ni NPF-i aruba ya kidangi pelashishia arurba lir. Asen party ana loktepbay ta telok lemtet ka dang masü saka asen külem mangdang, kati ka akhümtsübutepba aser külemi tarutsü tajung yangertsü temulungtetba ajanga lir" ta Rio-i ashi.

NDPP president Chingwang Konyak aser NPF president toktsür Apong Pongener nati party ana timi lokteptsüsa mapa inyakba atema pelar ta pai ashi.

"MLA 2 aliba party den MLA 32-i teka amtepogo. Iba ajanga asen nübertem ajungtsü mechi nung bendanga agütsüba aser longjemba sayur" ta Rio-isa metetdaksü.

NPF-i Indo-Naga yimten tebilemtsü tangatetep kati arutsü atema bendanga agüja inyaktsü ta paisa shisem.

"Tanü lanurtemi tajungtiba shimtsü, sorkar ketdangsubaren ajungtsü, tashishitsü melii terenlok mapa inyaktsü aser parnok temetentem mapang shitak nung agütsütsü akhanger" ta paisa ashi. Neiphiu Rio-i 2030 tashi küm pungu NPF Tir inyaktsü.

Tanü mungdang nung Emeritus President Chingwang Konyak den working presidents pezü dena NDPP aser NPF nungi ketdangpur 100 tema shimogo. Külen, MLA Achumbemo Kikon-i maneni Secretary General inyaktsü shimshiogo.

Nagaland DGP-i police dang bendanga agütsüshitsü ayongzüker



Nagaland Police Headquarters nung tanü Police Commemoration Day amungdang tangokba noksa nung angur.

Kohima, October 21, 2025 (TYO): Director General of Police, Rupin Sharma-i police ajak dang nüngdakba mapang bendanga agüja inyaktsü tezüngzüktep agishitsü ayongzüker.

"Asenoki asen nübor tenzüksü, asen linük kümzüka ayutsü aser nüngdakba mapang bendanga agütsütsü tezüngzüktep agishidi" ta Rupin-i ashi.

Nagaland Police Headquarters nung tanü Police Commemoration Day amungdang pai iba tayongzüka agütsü.

September 2024 nungi taküm August ita tsüngda India kübok tesem balala nung police 186-i taküm bendanga agütsüba atema tetushi agütsür. Tasürtem rongnung Nagaland nungia 9th

NAP (IR) nung Constable Chandan Das dena liasü ta DGP Rupin-isa ashi.

Asür Das ya mapa teinyakdak nung asü aser iba ajanga pa tango sademba mapang tashi mapa nung bendanga agüja tenzüka tatishitsü tajung sayur.

1959 Aksai Chin ambush mapang China sepaitemi CRPF personnel 10 tashi tepset aser iba anogo bilemteta kümshia Police Commemoration Day amunger. October 21 nü Hot Springs, Ladakh nung parnoki taküm bendanga agütsüba anogo ya linük nung mapa teinyakdak mapang taküm bendanga agütsür police nem tetushi agüja amunger ta Nagaland DGP-i metetdaksü.

Nagaland Police-i tenangzüka tajung yur mapa meranga inyakba

atema tenünsang agütsür. Nagaland Police-i anibelem arema law & order tiptema ayuba ajanga public-i temulung tali alemer aser police nem konang bentsür aruogo ta paisa ashi.

"Tanü ya mangyimba anogo ka dang masü saka asenok police ajanga mapa tajung inyakba atema benjungtepbay anogo ka lir. Police ajaki tasü itta aser bendanga agüja inyaktsü ayongzüker" ta DGP Rupin Sharma-isa ashi.

Iba sentong nung AIGP Rangkathung Vikram Ezung police 186 indang roll of honour zünga metetdaksü aser DGP Rupin den PHQ ketdangsurtem, state police battalions balala aser tanga security forces-i tasürtem nem tetushi agüja narjungtem yutsü.

NPF-i NDPP den loktepbay agizüker

Kohima, October 21, 2025 (TYO): Mongulbarnü Naga People's Front (NPF) General Convention nung NPF-i Nationalist Democratic Progressive Party (NDPP) den ka kuma loktepbay agizükogo.

October 21, 2025 nü iba mungdang ya Indira Gandhi Stadium, Kohima nung amung aser iba anogo ya NPF 63 buba Foundation Day lir.

Iba mungdang nung NPF active party members 5,000 shi aden aser parnoki teka metonga NDPP-i NPF den loktepbay mulunga agizük. October 18 nü Central Office Bearers (COB) aser Central Executive Council (CEC) ajanga bangzüngtem renema aliba tanü loktii agizükogo.

Tanü mungdang nungsa President tasenba Chief Minister Neiphiu Rio aser Secretary General MLA Achumbemo Kikon nati anir 2025-2030 kümsük atema COBs, CEC züngsemtem den frontals aser cells ketdangpur tasentem shimogo.

NPF mungdang nungsa state nung People's Democratic Alliance (PDA) tashi itdaksütsü

aser National Democratic Alliance (NDA) o North East Democratic Alliance (NEDA) nung shilem agiba züngsem ka maneni asütsü bangiemtepogo.

India sorkar aser Naga political groups tsüngda olemtep tajungba agia aotsü aser tekaraba nung telemtetba ka agitsü NPF mungdang-isa ayongzüker.

Arogo, public, taintem aser namanirtemi NPF pusema nungitba atema pelar aser regional tangatetba aliba sensotem aser taoba party züngsemtemi NPF nung tanaben adentsü mepishir ta mungdangisa metetdaksü.

Nationalist Democratic Progressive Party (NDPP)-i NPF nung adenba ya otsütsü aketba asentenshi ka lir aser Tsüngrem nungi telongjem sempet ka lir ta Naga People's Front (NPF) President Apong Pongener-i ashi.

"Iba sentong ajanga party tanaben takok ngua asentenshiba sayur aser iba ya telongjem ya politics nung dang masü saka Naga loktiliba ajak nung aser Naga political groups nung ataloktsü ayongzüker" ta pai ashi.

"Chief Minister Dr. Neiphiu Rio, NDPP president Chingwang

Konyak aser parnok den yaritepertem NPF nung pelashishia agizüker. Iba teloktep ajanga regional political entity tashitait ka adokogo aser iba ajanga Naga nung aser Northeast nung tanga kintem taginübatem atema noktaksü" ta Apong-isa ashi.

NPF ya 1963 nung tentet aser Nagaland nung regional party mezüngbuba aser India nung DMK sülen regional party tanabuba lir. Elections nung tamakok nguaka district 17 prong nung NPF tera yanga lir ta paisa ashi.

Tanü mungdang nung NPF Secretary General & MLA Achumbemo Kikon-i 2024-2025 report zünga metetdaksü.

1963 küm A. Kevichusa lenisüba kübok NPF tenteter tenüng tenetben tashi melena aruogo saka party indang motto "Fide Non Armis" (By Faith, Not by Arms) aser antebong symbol memelenshi ta Kikon-i ashi.

NPF-i Free Movement Regime (FMR) agienba aser arrtsü atsüdangba anema lungkak aitiba sentongtem ayonga agiogo. Naga nung aser yamaji alitsü ta paisa nenshia metetdaksü.

(Maneni tapak 2 nung...)

NSLA-i NSPCB den lungjemer Kohima nung seminar ayongzük



NSLA-i NSPCB den lungjemer Kohima nung seminar ayongzük akaba mapang tangokba noksa nung angur.

Dimapur, Mongputeni/Oct. 21 (TYO): Nagaland State Legal Services Authority (NSLSA) ajanga Nagaland State Pollution Control Board den lungjemer October 18, 2025 nü Japfü Hotel, Kohima nung "Environmental laws and the harmful impacts of pollution and environmental degradation" indang seminar ka ayongzükua liasü.

NSLSA Member Secretary, Neiko Akami, NJS ajanga iba sentong ayongzükba nükjidong rateta jembidang, stakeholders balala densema nübur nem awareness agütsü asoshi iba ama sentong tali ayongzükua agitsü nungdaker ta ashi aser libajen wazüka ayutsü nungdakba indang tongmelang agi rateta ashi.

Libajen tebilemtsü ajanga tang asen dak kongshiba tatishitsü amshidang, state nung atsükba, tzümetzung, ali metenzüka aoba, alinen aluba, mopung menenba, tzü agi anüngba indang ashi aser state tesem balala nung two lane aser four lane lenmang tem yangluba ajanga arem min aser yangji aliba

takumsangu tem samatsür ta ashi.

"Lenmang tajung aliba ajanga rongsenketzung tajungba kumdaktsür aser senzusempongba nung anisüngzük aliur, saka ali tulu onzüka ajanga ayong tem nung molushi ayimer aser ali metenzüka aor aser alu nung kongshir," ta pai ashi.

"Tzülu aika ramatsüogo, anungji chiyongtsü adokdaktsüba maparen ajema akumer aser süngdong-lidong raksatsür. Ayong tem nung ozüng agi memelaba mapa inyaker aser ayong nung angu mali kumogo. Lenmang yangluba aser ali rongse bushidang arem samatsür," ta paisa ashi.

Iba atema Akami-i sentong nung adenertem dang süngdong-lidong jenti atemtsü asoshi sorkar nem sentong yangludaktsüsüla aser shisatsü agütsüba sentongtem ayongzüksüla, ta ashi.

Pai tekong lu ayimba aser arem rongdokba ajanga libajen nung kongshiba indanga shia liasü.

Pai arem shiruru aliba

tesemtem wazüka ayutsü aser state nung Wild Life (Protection) Act shidak amshitsü nungdaker ta ashi.

Technical session mapang shisalen sayur Sidramappa Chalkapure, IFS, Chief Conservator of Forests, Kohima Nagaland ajanga 'Legal Framework for Conservation of Forests, Wildlife & Environment' indang onük nungi jembia state nung item dak sendakba acts aser ozüng tem rateta ashi.

Akangmeren Imchen, Scientist 'C', Nagaland Pollution Control Board ajanga 'Environment (Protection) Act 1986 & the Water (Prevention & Control of Pollution) Act 1974' indang jembia, Yanthung Kithan, Scientist 'B', Nagaland Pollution Control Board ajanga 'Air (Prevention & Control of pollution) Act 1981 and Solid Waste Management Rules, 2016' indang jembia liasü.

Iba sentong nung Nagali Shohe, Panel Lawyer, Kohima DLSA menden liasü aser DLSAs balala nungi Para Legal Volunteers aser Panel lawyers tem dena liasü.

Kuki kaketshir 62-i SSC CPO tatidang nung takok angu

Imphal, Mongputeni/Oct. 21 (Agencies): Kuki nunger candidates 62-i Staff Selection Commission's Central Police Organisation (SSC CPO) sub-inspector examination 2024 nung takok nguogo, aser Manupur nung kin balala tsüngta mepetmesü adoka aliba mechi iba tatidang ajangteter kaketshir aika relief camps tem nung alir.

Kuki Students' Organisation General Headquarters ajanga iba results ya October 20 nü sangdong, aser par kin nungi nisung meyerijang aika mepetmesü mechi pei ki yutsür tesem balala nung prokshia shisaluyim aser examination centers atongtsüa tumtema liasü.

"Nenok takok ajanga nenok sempet jangjatsür," ta iba lokti ajanga tepela lemsatepba nung ashi aser kibong aika tetsübo aser teimla samar litar ta ashi.

Tensa tia mejungi liaka kaketshir temi competitive examination nung junga shilem agiba ya atangji nung tesümgangtsüka lir.

Mepetmesü aliba ajanga nai nü mangdang arishiba manendaktsütet aser tatem nung asangsang kumogo ta sayur, ta ashi.

Iba takok ya ajanga kin nungi mapa bushirtem ajungmesotsü atema tatishitsü tajung sayur, ta Kuki Students' Organisation General Headquarters ketdangtsür temi ashi.

Kaketshirtem tatidang asoshi renemba nung Ultimate, Gunchu, Endurance, Accelerate, aser Concept densema coaching institutes balalai shilem tulu agiba atema KSO General Headquarters ajanga tenüngsang agüja liasü.

Kuki nunger mapa bushirtem examination center melenshiba, appointment orders menuba aser danga administrative timtem nung yariteptsü renema lir ta iba kaketshir tentet ajanga ashi.

SSC CPO examination ya küm shia Delhi Police, Central Armed Police Forces aser danga ozüng amshiba agencies densema central police organizations nung sub-inspector shimtsü asoshi agir.

Chakhesang Youth Front ajanga Phek police nem tenüngsang agütsü

Dimapur, Mongputeni/Oct. 21 (TYO): Kizari nung tashiyim amshia shi nung medema tepsettsü merangba mapa nung temulung melemi alir apuba atema SP Phen-i anir Phek Police aser Deputy Commissioner, Phek-i anir district administration dang pelaba lemsateper, shiba September 25, 2025 nü FIR agütsüba sülen atsükshia senzua liasü, ta Chakhesang Youth Front (CYF) sangdong ka ajanga ashi.

CYF ajanga bushisüngdang dang chargesheet yangluba mapang kinük-kisang ajak akaktsü aser tai tonglokja alisang nem ozüng agi mela aliba tematiba jenjang nung temerenhi agütsütsü ayongzüker, ta ashi.

CYF-isa obendanger tem dang ken o tekeraba nung aser shidak jembia obendang magütsü tashi tai tonglokja alir

nem bail magütsütsü mepishia liasü.

Lai temang nung timtem tulu ajuruba ajanga victim ya tang tanükba agüja lir, aser tai tonglokja alisangi pa takum agitsüa amokmeren, ta CYF sangdong ajanga ashi.

Iba ama tensa nung tai tonglokja alir memerenshi yutsüra, timtem ajuru alir asoshi lendong tulu asütsü.

Bushisüngdangba mapang tai tonglokja alir yaria kija mesüra telok shingaia bail memeshitsüsüla. Tai tonglokja alir bail agüja timtem ajurur alir dak langka danga atalokra, onoki tapet mera agitsü, ta CYF-i metetdaktsü.

Ajidang masü tai tonglokja alir bail nung lia langka kar atalokra CYF khuret masütsü. Onoki judiciary dak tamang akar aser nenoki mapang shidak nung ochi obendang agütsütsü imlar, ta CYF sangdong ajangasa ashi.

DC Wokha ajanga Banana Festival 2025 atema sentong lemsatep

Dimapur, Mongputeni/Oct. 21 (TYO): Deputy Commissioner Wokha, Vineet Kumar, IAS ajanga Public Ground, Wokha nung October 22-24, 2025 anogotem 1st Banana Festival 2025 agitsü aliba indang sentong lensamteptsü asoshi October 18, 2025 nü DC Office, Wokha nung osangbener den senden ka mena liasü.

Iba benjong ya District Planning & Development Board (DPDB) ajanga Krishi Vigyan Kendra (KVK), Wokha aser sendaktepa aliba department balala den lungjemer ayongzüksü. Ibai Five-Year Vision Document kübok tongtipang inyakyim ka alitsü, koba taoba mapang Union Minister of State Dr. Jitendra Singh lia semzüka liasü.

Iba sentong nung Special Guest ama Deputy Chief Minister, T.R. Zeliang aser Chief Host ama Deputy Chief Minister, Y. Patton adentsü.

Ibai benjongmung ka kisung masü saka aluyimer 6,000 dak tema nem tashi agüja market linkages nung yariteptsü aser scientific yimya amshia alu

ayimba aser value addition jenjang ajungkettsü nükjidong lir, ta DC Wokha, Vineet Kumar-i ashi.

Iba benjongmung ajanga Wokha ya somomo tsünüba aser danga agricultural products atema tesepe ka ama akumtsü imlar, ta pai ashi.

Iba benjongmung ya ICAR-KVK Wokha lungjemer ayongzüker, kong NABARD, Central Institute of Horticulture, Indian Institute of Horticultural Research aser India aser Nagaland tesem balala nungi lokti tentet 30 dak temai yaritsü. Asemnü benjongmung nungya somomo agi yangluba products balala sayua stalls 100 dak tema lapoktsü, farming innovations aser alu nungi züsentetba tem angutsü.

Aluyimer asoshi technical sessions nung takotet aser tongtipang nisungtemi shisa lemsateptsü, somomo achiba tetoktepba alitsü aser "Best Banana Bunch" tetoktepba alitsü.

Deputy Commissioner ajangasa nüburtem dang iba benjongmung nung arua shilem agia aluyimer yaritsü ayongzükua liasü.

NPF-i NDPP den loktepba... (TAPAK 1 NUNGI...)

NPF-isa Manipur nung President's Rule aitsüogo aser popular government ka akümstü ayongzükogo ta Kikon-isa ashi.

NPF-i "One Nation, One Election" magizük kechiyong iba ajanga regional olatem asoshi timtem agütsütsü. NPF-isa 16th Finance Commission aser High-Level Committee on ONOE dangi shiditem züluogo ta pai metetdaktsü.

"Naga yimten tebilemtsü atema party-i ajak adenba aser agizükterba lemtet ka agitsü maneni nenshia arur. NPF-NDPP loktepba ajanga nübortemi mapang talangka nungi regional sabang tashitait ka aginüa aruba

ataloker. Party züngsemtemi Naga tamangba yimsü, temetentem aser ali kümzüka ayutsü ayongzüker" ta Achumbemo Kikon-isa metetdaktsü.

"Iba anogo ya tetiaba aser senmangtsü mapang ka lir. Regional party tongti ana nungi lennirtem

MLA & NPF Legislature Party Leader Kuzholuzo (Azo) Nienu-ia ashi.

Iba mungdang nung Manipur State Unit president & MLA Awangbow Newmai aser Arunachal Pradesh Unit president Happa Taidong natia o jembia.



Ungma Senso Telongjem, Kohima ajanga October 18, 2025 nü Ungma Kiti, Kohima nung 9th Academic Excellence Award sentong atongzükua liasü. Iba sentong nung Union ajanga Lanuienla Longkumer (D/o O. Tinu Longkumer) nem tenüngsang agütsü, shibai Bangalore University nungi M. Sc Geology nung "Sri. C. C Suryanarayana Rao Gold Medal" ngua liasü.



Chennai nung tzünglu kanga sashia aruba sülen tzü atsünger aliba temple ka nung nüburtem tangokba noksa nung angur. Mongolbarnü district 8 atema red alert aser Chennai atema orange alert agüja liasü.

Jubilee Hills bypoll nung AIMIM-i Congress yaritsü

New Delhi, Mongputeni/ October 21 (Agencies): AIMIM tir Asaduddin Owaisi-i sangdong ka ajanga, par party-i Jubilee Hills Assembly bypoll nung Congress candidate Naveen Yadav yaritsü ta shiogo. Jubilee Hills Assembly bypoll koba November 11 nü agitsü lir, iba election nung Congress nungi Naveen Yadav, BRS nungi Maganti Sunitha aser BJP nungi Lankala Deepak Reddy nunger toktepba angutsü. Iba election nung Congress pusemtsü atema telemtetba agiba indang jembiba mapang AIMIM tekolakba yagi ashiba agi, parnoki Congress candidate yaritsü telemtetba agiogo, kechiyong election result ajanga sorkar dak mekongshitsü. "Iba election result ajanga sorkar memelenshitsü anungji

onoki Jubilee Hills nung voter (lakh pezü) tem shirnoki taoba kü10 tashi BRS pusemogo, parnok dang Naveen Yadav nem vote agütsütsü mepeshir, shiba lanur ka aser pai Jubilee Hills nem terenlok bener arutsütsü," ta Owaisi-i PTI dang ashi. BRS MLA Maganti Gopinath taküm June ita asüba sülen iba Hyderabad menden atema bypoll agitsüsa aküm. AIMIM-i Jubilee Hills' nung Congress candidate yaritsü telemtetba agiba ya Congress atemabo tajangzük asütsü, kechiyong Bihar nungbo Owaisi-i aniba party ya Mahagathbandhan den alliance meyanglutet. Bihar nung parnok kija tokteptsü sangdongba den candidate 25 tenüng sangdongba sülen AIMIM ya

Congress densema lenla ajak nungi aitsüdar. Iba party yagi 2020 küm assembly election nung menden 5 koka liasü. Congress lenir Udit Raj-i AIMIM aitsüogo aser ashiba agi, par party-i Bihar nung sorkar kümtettsü asü masü ta asüngdang. Udit Raj-i, "Muslim nunger kari parnok ajangzüksü asoshi B team küma BJP yaridar. Parnoki (AIMIM) Bihar nung sorkar kümtettsü asü? saka Bihar nung BJP nem sorkar kümtetdaksütsü atema parnok election nung tokteper," ta ashi. Owaisi-i ashiba agi, par party-i RJD tir Lalu Prasad aser par jabaso Tejashwi Yadav dangi parnoka INDIA bloc nung shilem ka ama election nung tokteptsü mulunga lir ta shia shiti zülüogo, saka tang tashi RJD-i kecha telangzüba agüja mali.

Telangana CM-i Maoists pur dang bendanga agütsütsü mepeshi

New Delhi, Mongputeni/ October 21 (Agencies): Telangana Chief Minister Revanth Reddy-i Maoists pur dang bendanga agütsür linük terenlok asoshi teyari agütsütsü mepeshia liasü. Hyderabad nung Police Commemoration Day Parade nung o jembiba mapang chief minister-i, yimjung benokba nung tongibang shilem agiba state nungi Naxalism aser kiralongrartem raktokba nung tongtibang shilem agiba atema Telangana Police nem tenüngsang agütsü. "Telangana ya mapang ka nungbo Maoist aser kiralongrartem inyakyim agi kangshia liasü. Ajisüaka police-i jenjang tapet agiba ajanga item inyakyimtem ya kanga ajema kümogo. Maoist lenir tongtibangtem

kabo bendanga agüjatokogo aser ni tangar danga parnok sülen anidaka extremist ideology tem toktsür linük terenlok nung shilem agitsü ayongzüker. Police temi kanga tasü ita inyaka tensa azüokba aser nüburtem nem tamang katetdaksüba atema tenüngsang agütsür," ta Reddy-i ashi. Telangana nungia police trok densema taküm pei taküm bendanga agütsüba police 191 nem tetushi agütsüba mapang chief minister-i, asür kibongtem atema teyari balala agütsütsü aliba sangdonga liasü. Pai constable Pramod Kumar'er kibong nem ex gratia crore kaka, retirement tashi itasen, sorkar mapa ka aser ki asütsü atema ali ka agütsütsü tenangzükba agütsü. Kumar ya Nizamabad nung

kaset. Kasa mapang nung Telangana police takok indang jembiba mapang Reddy-i, India Justice Report 2025 indang metetdaksü, kong Telangana Police ya linük nung temaba jenjang nung lir. Ministry of External Affairs-ia, Telangana indang passport verification inyakyim tajung tenüngsangogo. Tetsükdaksü balala ajangshiba indang jembiba mapang chief minister-i, cybercrime, digital fraud, morphing, aser temesepba mozü shibelenba tebilemtsü lemsatepa liasü. Paisa, Cyber Security Bureau' mapa tajung asoshi tenüngsang agütsü aser Telangana ya "Drug-Free State" kümdaksütsü atema elite task force; "Eagle" amenokba indang metetdaksü.



National Police Memorial, New Delhi nung Police Commemoration Day amungba mapang Union Defence Minister Rajnath Singh tangokba noksa nung angur.

JSP candidate tem nongshiba atema Kishor-i BJP aitsü

New Delhi, Mongputeni/ October 21 (Agencies): Jan Suraa Party ngutetsang Prashant Kishor-i, taruba Bihar assembly election atema nomination file sür aliba agintsü atema par party candidate asem nongshiba atema BJP aitsüogo. Taitsüba nung pai Union home minister Amit Shah aser Education Minister Dharmendra Pradhan na tenüng tetshia liasü. Bihar nung election atema Shah ya BJP indang chief strategist aser Pradhan ya party indang election in-charge lir. "Noksa ya reprangang: nenoki home minister Amit Shah aser Dharmendra Pradhan na angutsü. Nenoki model code of conduct indang jembir... home minister-i candidate ka pa den anogo tepeyong ayu, ajita asünungdang pai nomination file mesütettsü," ta Kishor-i Patna nung osang benertem den sensaksemba mapang ashi. "Home minister-i nisung ka

pa den kangshia lidaktsüra iba nisungba yagi kechi sütettsü? Election Commission kong ali? Central minister anati Jan Suraa candidate tem longbanger.. Idak nungi onok tashishiba ka benoktsü atema Election Commission dangi aotsü," ta paisa shisem. Election nung metokteptsü atema telemtetba agiba candidate tem ya Danapur, Brahampur, aser Gopalganj menden nungi tokteptsü atema nomination file sür liasü, ta Kishor-i ashi. Poll strategist aliba nungi politician akümsang yagisa, NDA pur tamakok angutsü tsübur ta shia Election Commission dang Bihar election nung tokteptsü aliba candidate tem ajak kümzüka toktsütsü mepeshia metetdaksüogo. Bihar assembly elections ya shilem ana küma lemsar November 6 aser 11 nü agitsü. Election atema vote November 14 nü azüngtsü lateta lir.

Punjab-i wheat metsü quintal 1,000 yokogo: UP CM Yogi



Lucknow, Mongputeni/ October 21 (Agencies): Uttar Pradesh chief minister Yogi Adityanath-i Mongolbarnü ashiba agi, tzümetsüng agi kongshir aliba aluyimertem atema Punjab-i wheat metsü quintal 1000 yokogo. Iba ajanga lendong timtem mapang Yogi-i aniba sorkari aluyimertem nongita yariba sayur. Lokti senden ka nung o jembiba mapang CM Yogi-i ashiba agi, "Punjab nung tzümetsüng aruba ajanga nüburtem libaliro dak kongshiogo, kong metsüjangnatsü rezünga ayuba daka kongshiba densema lir, aser iba ajanga aluyimba terenlok dak kongshitsü akok. Tanü wheat metzü quintal 1000 yoker aser ni iba inyakyim tajung asoshi Agriculture Department aser Seed Department dang kanga pelar. Paisa, Punjab-i yokba wheat ya anogo 155 nung amener aser hectare ka nung quintal 80 tashi roteter, ta shia parnoki agütsüba metsü jenjang koda tajung iba indang metetdaksü. Kasa mapang nung chief minister-isa, Harvinder Sahib Govind nem pa asoba anogo tenüngsang tetushi agütsü, aser pai lokti terenlok atema mapa tajung inyaka toktsübatem indang lemsatep. "Tanü ya Harvinder Sahib Govind asoba anogo lir, shibai nüburtem ajungkettsü atema

tanen makai meranga inyakogo aser pai Punjab semdangba mapang pa atema milentem tsüklokja liasü," ta CM-i ashi. Taoba mapang teyari balala agütsüba indang jembidang CM Yogi-i ashiba agi, Punjab, Uttarakhand, aser Himachal Pradesh nung tzümetsüng aruba mapang UP sorkari relief osettem yokba den Chief Minister indang Relief Fund ajanga teyari agütsüogo. "Aser tanüa Punjab nung aluyimertem nem metsü quintal 1,000 yokba atema tenüngsang agizüker. Iba wheat metsü kanga tajung lir," ta Yogi-i shimsem. Maneni chief minister-i, Seed Development Corporation inyakyim tushia jembia aser ashiba agi, tang aliba sorkari sorkar kümtetba mapang iba department ya jenjang kanga mejungi liasü. Kasa mapang nung taoba mapang Punjab finance minister Harpal Singh Cheema-i ashiba agi, tang agia aliba State Assembly session nung Rehabilitation Bill indang maneni jembitsü, koba Punjab nung tesem balala tsümetsüng agi kanga mejungi kongshia teraksatsüba tulu adokdaksüba sülen Punjab chief minister Bhagwant Mann-i benoka liasü. Paisa, Punjab-i teyari crore 20,000 meshi saka Ato Kilonser Narendra Modi-i crore 1,600 dang agütsütsü sangdong, koba tang tashi magütsüi lir, ta ashi.



TIR YIMYIM YIMOBILEM (EDITORIAL)

DIMAPUR WEDNESDAY, OCTOBER (MONGPUTENI) 22, 2025

Kechiba temang ayoker ?

Tawa Dimapur nung Bihari nunger autorickshaw anishir ka nem Nagatsür aiür chanu anati tena mobile recharge asütsü atema sen noklang terokrok yong tena temang ayoktsüsa akümba tiaji Naga nunger tsürabur, lokti tentet, arogo aser government asoshi tamakok aser rungda teinyaktsü watang tuluka sayur. Ibaji taaktsü mapa tamajung ka lir aser aiürla ana jagia mapa tajungbo masüa ta meteta alitsü, ajisüaka tena temang ayokba agiang tena taküm nungdak peritsüsa akümba tiaji, tesempatsü melen temeimtsüka dang bilemer. Tangbo aiürla anaji dang putetba agi tena indangjiang jembir dang ashi, tena amaji, talisa, Dimapur nung Naga tsür aiür chanu aika senzüa angutsü. Itemji tsürabur kibong kaka nungi aruba jalatem lir. Ashiko, item aiür chanutemji tazüngi aruba asütsüa akok mesüra mapa bushii aruba asütsüa akok, anungji tsüraburtemibo parnokji yamaji temang yoka alibajibo memeteti alitsüa akok. Aji oda, tanü Dimapur indang jembir dang ashi, India nung yimten tesem balala nung Nagatsürtem aika kasa tia nung litepdar asütsüa akok. Itemji bilemdang dang taaktsü aser tejashitsüka saka parnokji aitsütsüla masü, kechiyong shibaibo iba lima nung pei temang yoka taküm linütsü ? Anungji, parnok iba ama tia kati aitsüsa akümbaji mezüngbuba taiji tsürabur agitsüla, tanabuba taiji arogo agitsüla, tasembuba taiji government agitsüla aser pezübuba taiji lokti tentet agitsüla aser tesüsaba taijiang peisasa pei taküm timtem marem aser mozüoktetba tai asütsü. Tanü asen lima nung asangurtem taküm raksabaji yutsür, aiür chanurtem raksabaji temeimtsüka aser tapayutsüka, kechiyong khien iba ama taküm yimya tenzükra melenshitsü tasak akümtsü. Iba tebilemtsü ya kibong nung junga sayutsüngi o mashiba, sarasadem mesütsüba aser sobaliba nung meintetdaksüba ajanga ataloker. Atangji, kibong makamaitba ajanga tsürabur aikati pei chirnurtemi aginüba ajak agütsünüaka magütsüteter aser talisa aiür chanurtem nungdaksa teimba akümer. Idangji, kidang kibong nung tsüraburi sayutsüngi o junga shia melira aser sarasadem agiba kibong mesüra aser sobaliba meteta intetba tanur ka mesüra pei nungdak ataloktsü atema ochimashi tenzüktsü aser oda –oda lokti nungi pilar seplepa senzütsü aser pei temang yoka alitsü tenzüktsü. Ibaji lokti aser yimten ozüng agi alentsü merangba agi majungtsü aser sentepi arutsü kisüng ajungshiba agia makoktsü. Aji oda, tanur nem pei kibong tia metetdakja aser tarutsü teimla agüja sayu o tajung agüja sarasademtsütsüba tsürabur ka asoshi kanga tongtibang teinyaktsü lir. Iba denji sobaliba tsütsü yimya awashi aser libaliro dang masü saka kidang nungi tenzüka tanurtem nem ki aser alu mapa inyak sayua intetdaksütsüba jisa tongtibangtiba lir. Tanübo asenok aikati tanur nem azüng-zülü metettsü aser kaketshisatsübo jenjang tematiba tashi tua bushitsü ajungshir aser takaba ajak tanur kaketshisatsü bushiba nung endoker, ajisüaka asenoki mebilemdang aser merajemba kaji tanur dang mapa inyakbo mesayur. Aji oda, azüng zülutsüji kanga junga metetaka aser tazüngba degree aika liaka, mapa inyak meshira peisasa taküm lia aotsüji tasak akümer. Aji oda, kidang kibong nung tanurtem den külemi alidang, parnok nem mapa lemsüka külemi külemi inyakba jagi telungjem aser teputep tali adoker aser mapa inyaka sensaksem dang tsüraburtem nungi tagitsü o aser otsü aika angazüker aser tsüraburtema tanurtem nungi shisa tasen angur. Aji oda, kidang kibong nung tanurtem dang ak an metsütsüba mapa sayutsüla aser aluisa maoyonga kidang aser ki anasa atsü yanglua yangji aonsutsü tsünüba yimya sayutsü aser aonsutsüji adoka külemi soruchioka chiyongtsü ta külemi inyakba aser külemi chiyongba sobaliba kisüng jagi tanur ka taküm meraksa tajung akümtsü. Item amaji, mapa tulu mesüaka, kidang tsüraburtem den külemi mapa inyakbayim angazüka aliba jagi pei taküm nungdakbo peritsüsa peisasa pei inyaktettsüba mapa ka mesüra kabo inyaka litettsü. Asenok asoshi tajung aser temoatsü kaji, asenok ajak aluyimtsü asoshiho ali kar, anungji asenoki dang inyakdi süra mapa tilateri inyaktsü atemabo bendangleni maoyonga asen lima nung asenoksasa inyaktettsü aser pei temang yoka alitsü melen pei temang agi pei asoshi dang masü pei yimten aser arogo asoshi mapa tajung inyaka pei taküm agi asen nümadanga litettsü.

OLEMSABANG

LOKTI LENNIR AJAKI LOKTIJI AROK MEYONG TA ANGATETA ANITSÜLA

~ L. Kika Pongener

Alima nung nisung shinga ajak nung ajak tabensa masü, nisung shia langka ka agibosa mabensaba agi sunga lir. Aji oda, alima nung alidang, nisung o nisung na kati ka ajungshitepa aser metongshitepa aliba ajanga dang tabensaba akümer. Anungji asenok tabensa taküm ka kümnura asenoki temetongshitsüba pela-a agizüktsüla. Tsüngrem o-i ashir, "Shibaisa temetongshiba meimer pai shisatsü meimer; Saka tarutsüba semparji tamaji" (A.Shin-12:1). Atangji, shirnoki ajungshitepa aser metongshitsüba pelaseta agizüker aser melenshir, parnok jagi shisatsü meimer aser parnok dangji tashitemeteter ta ajar. Tashitemeteteri tangar nungi shisatsü agir, saka tamashiri tangar nungi shisatsü magir, saka pei mulongba dang inyaker. Shirnoki temetongshitsüba magizüker, parnokji teti shisatsü tangatetba nung anung-akonga alitsü. Ajisuaka, shirnoki temetongshitsüba agizüker aser melenshir parnokji nubur ajaki akümtsüba tushitsü. Atangji, alima nung nisung shinga noklang nung noklang tabensa/tetemsu (100 % Perfectness) malitsü sudi. Nisung shia langka ka agi madoksa, kar tesem kar nung mabensa ta alir. Nisung ka ajak nung ajak tabensa ta shira, iba nisungjibo nuji masü (Abnormal) ta ashitsü akok. Anungji asenok kati ka metongshitepa alitsüla aser metongshitsüba pelaseta agizüktsüla. Talisa, lokti nung lennir ajaki loktiji pei jurila meyong amai mangatettsüla....Loktiji arok meyong ta angateta nubur ola angaa; aser nubur taginuba metettsü meranga loktiji anitsüla.

Ano asenoki tamangba tanela-ren nunga shisadangra, tamanger shia tashimaitba kabosa alitsü. Anogo shia Khristan taküm ka alima nung lia aodang memeteti temenen mena-a aibelentsüsa akümer. Anungji anogo shia, ghonda-minute-second shia Tsüngrem dang tatok meshia, nangzükjen nangzüka alinung dang Khristan taküm kaji meshiteta tabensa taküm ka akümer. Paul-i Rom nunger dangi züluba ama, "Ajaki temenen menaago, aser Tsüngrem sentsüwangshi matonger" (Rom-3:23). Atangji, Khristan taküm ka, iba alima nung alidangbo, ajak tabensa taküm ka alitsüba kanga dang tasak asütsü. Anungji asenok alima nung ali tashi kati ka metongshitepa aser kati ka ajungshitepa alinungang, asenok ajunga liromedema, putepa, jungtepa aser meimtepa alitsü. Kechiyong aseni asen sasa asen tashimaitba aser mabensaba mereprangteter, saka tangar kati dang asen tashimaitba aser mabensabaji tuteta ashitsü akoker. Anungji shir-i asen dang aseni abensa-a tongjema meinyaktetba mapatem metongshitsür aser melenshitsür, aji asenoki pelaseta agizüker melenshira asen taküm asoshi, asen adenba telok aser aseni aniba yimden, arogo, mung dang aser lokti asoshi-a koda-ka tajangzük asütsü. Atangji, Tsüngrem o-i ashiba ama, shibai/shirnoki tajungshiba, temetongshitsüba aser melenshitsüba meimer, pai/parnok shisatsü meimer....Tetezü, shirnoki tajungshiba aser temetongshitsüba pelaseta agizüker parnok dangji tashitemeteter, shisa taka nisung aser lennir tajung".... ta ajatsü.

Asenok ajaki metet, tanu asenok aliba putu ya kechisarena ajak nung kanga kara-a melenshia aoba putu ka lir. Ajioda, koba tashika melenshia renloka aor, patakaji yanglushia melenshitsüsa, metok-meperi aser mabensabaji adokjen adoker. Anungji kechi mapa sudir suaka, kechi inyakago aji tatem, joko iba nungji kecha temelenshitsü malia ta nisung kari tangatetba lira, ajibo tamashi tangatetba asütsü, anungji ajibo melenshitsüla. Ken o nung asüyonga kechi lemtetogo aji telemtet; ibaji tatempang; aji joko memelenshitsü ta tangatetba lennir shinga daka malitsüla. Kechi mapa inyakdir inyak-aka, asen pei jurila atema inyaker sura ajibo pei mulong; saka yimden, arogo, mung dang aser lokti atema inyakba mapa ka sura; ajibo nubur nungi shisatsü agia; nubur ola angaa inyaktsüla.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Khristan university ketdangsür anema ken o benoka aliba SC-i agientsü

New Delhi, Mongputeni/Oct. 21 (Agencies): Uttar Pradesh nung Khristanpuri lapokba university ka indang vice chancellor, director aser ano ketdangsür asem anema tamangba yimsü melendaktsü ta tai tonglokja ken o ka benoka aliba India indang Supreme Court-i agientsüogo aser Hindu lenir kati benokba ken o nungya "legal defect" lir ta ashi.

Iba ken o ya April 2022 nung Vishwa Hindu Parishad (VHP or World Hindu Council) indang tatong tir Himanshu Dixit-i benoka liasü, shibai Sam Higginbottom University of Agriculture, Technology and Sciences (SHUATS) ketdangsür temi ozüing agi memelai tamangba yimsü melendaktsüba mapa inyaker aser ashiochtsür, mapa tamajung inyaktsü amokmerener aser documents nung ashikülak mapa inyak ta tai tonglochtsü.

Iba university dang taoba mapang Allahabad Agricultural Institute ta jaa liasü, koba American Presbyterian missionary Sam Higginbottom-i 1910 nung lapok.

October 17, 2025 obendang nung Justices J.B. Pardiwala aser Manoj Misra indang bench ajanga iba ken o ya taneptsü makokba 'legal defect' agi tim atemer aser iba mapang aliba statutory scheme nung shia aliba ama ozüing agi memelaba nisung kati benok, ta ashi.

Uttar Pradesh Prohibition of

Unlawful Religious Conversion Act, 2021 kübok jashia aliba nisung - tatishitsü agi timtem ajurur mesüra kinunger chichi - kati ang ken o benoktsü melar, ta obendanger temi ashi.

Iba ozüing dang anti-conversion law ta ajar, koba nisung mashi kati ken o benoktettsüsa 2024 nung yanglushi. Saka 2022 küm benokba ya taoba mapang aliba ozüing küboki aiter ta court-i ashi.

"Iba ama tensa nung, ochi obendang nüngdaka alibaji FIR aser iba ajanga ozüing tsütsü inyakyim ajunga agientsüba ya dang lir," ta obendang nung ashi.

Ajisüaka court yagi iba dak sendakba nung ashiochtsür, mapa tamajung inyaktsü amokmerener aser documents nung ashikülak mapa inyak ta asüba ken o magientsü. Totuyuba nung tai tonglokja alirtem maputsü shia lir, shirnok tangbo bail nung lir.

Uttar Pradesh nung arogo lenirtemi iba obendang pela agizük aser iba yagi 2021 ozüing kübok ken o benoka aliba Khristanpur aika ajangzüchtsü ta ashi.

"Iba totuyuba ajanga Khristantemi ozüing alema tamangba yimsü melenshiba nung shilem magi ta onok tangatetba kuli agütsüogo," ta Pastor Joy Mathew-i ashi, shibai anti-conversion law kübok tai tonglokja aliba Khristanpur yarir.

"Iba ama taila ken o ya yimjak nung kanga prokshia lokti tulu tamangba yimsü melendaktsü ta tiazü angatetdaktsür," ta pai ashi.

Paisa Khristanpur dak tenük yoktsü atema police temi VHP ama hardline telok tem den lungjemer inyaker ta aitsü.

2024 amendment ya meshidak ta Supreme Court nung Khristanpur telok balalai ken o benok aser iba yagi Constitution nung tamangba yimsü temeden wazüka ayutsü shia aliba nung aibelener ta ashir. "Kin tilatem tetsübo makai pei mulungba tamangba yimsü amangtsü aser sangdongtettsüsa obendang agütsütsü imlar," ta pai ashi.

Uttar Pradesh ya Hindu yimsü bhukumba Bharatiya Janata Party ajanga yimsü asür aser 2024 küm India tesem balala nung Khristanpur reshikangshia amshiba tatalokba 834 aliba nungi 209 iba state nungi lir, ta United Christian Forum ajanga ashir.

Iba state nung nütsüing yongsük million 200 dak tema aliba nungi Khristanpur shilem 0.5 aser Hindu nunger shilem 80 shi lir.

Higginbottom-i tenzükb a university ya Catholic Church densema Khristan denominations 14 tenüing nung board kati ketdangsüa liasü aser tang Rajendra Bihari Lal aser Vinod Bihari Lal ajanga ketdang asür.

Pakistan nung police-i TLP lenirtem apu, Khristanpur pelar

Lahore, Mongputeni/Oct. 21 (Agencies): Pakistan nung Khristanpur aser danga tamangba yimsü amanger nem timtem agütsüba Muslim extremist political party lenirtem jenti taoba hopta apuba sülen Khristanpur temulung nung anisüingzüik angur.

Tehreek-e-Labbaik Pakistan (TLP) ajanga rongrong adoktsüsa longkak aitba anendaktsütsü aser "Gaza solidarity" march arishitsü mechi October 13 nü Punjab Province sorkari anepbongi operation tuluka tenzüik.

Tawa US tiyongi ia Israel aser Palestine nunger telungpur Hamas telok tsüingta ceasefire agreement yangluba ya Palestine nunger amokbanga ajemreptsü atema tasa ka lir ta shia TLP yagi Lahore nungi Islamabad tonga jajatsü aser US embassy kima longkak aittsü nükjidong liasü.

Longkak aiter den raratepba mapang police ka asü aser ter dak tema yiru, ta Punjab police-i sangdong ka nung ashi. Sangdong nungya TLP züingsem asem tepset ta ashi, saka TLP den sendaktepa aliba social media nungbo police inyakyim ajaka parnok noklang aika asü ta ashi.

Police operation ya Lahore nungi kilometer 50 shi pilar Muridke tesem nung agia liasü,

kong longkak aiter tem aonung mejangtsü asoshi camp yanglua liasü. TLP anema security operation agiba sülen Punjab sorkar ketdangsür temi ashiba agi, parnoki nisung 2,700 dak tema apu aser nisung 2,800 shi "exit control list" nung ayu, anungji parnok linük nungi ainshitsü memelar.

Sorkari yimti balala nung party den sendaktepa aliba mosques aser seminaries 60 dak tema aser Lahore nung par headquarters shibangtsü. TLP tekolak Saad Hussain Rizvi aser tenu Anas Hussain Rizvi jena oa Azad Jammu and Kashmir nung jenoka lir ta ashir.

Punjab Chief Minister Maryam Nawaz Sharif-i sangdong ka nung province sorkari extremist party ka shibangdaktsütsü asoshi federal sorkar dang asüingdang ta ashi saka parnoki TLP tenüing tuteta mashi.

"Mepetmesü adokdaktsür, tesempatep adokdaktsür aser ozüing nung aibelener tem tekeraba nung aputsü. Extremist party indang lenirtem Anti-Terrorism Act indang Fourth Schedule kübok ayutsü," ta sangdong ajanga ashi.

Fourth Schedule ya Pakistan indang antiterrorism ozüing kübok kiralongrar aser sectarianism südi ta temulung

melemi aliba nisungtem indang list ka lir.

"Extremist party indang ki o jen aser rongsen ajunga Punjab Auqaf Department nem agütsütsü. Extremist party indang posters, banners aser advertisements ajunga nokdangtsü," ta sangdong ajanga ashi.

Party indang bank accounts ajunga soittsü aser tesempatep adokdaktsüba social media shibangtsütsü. Loudspeaker Act nung aibelener nem tapet temerenshi agütsütsü, ta Punjab sorkarisa nangzüik.

Mumtaz Qadri bhukumba atema TLP ya nüngtugu akum. Punjab Governor Salmaan Taseer-i tamangba yimsü mezüingmeshi ta tai tonglokja alila Khristan tsür Aasia Bibi dang aria bilemba lemsatepba yong police constable Qadri-i akha.

Party yagi 'Islamist import' dak sendakba nung maneni nübu ayongten aser November 2017 nung mezüingbuba longkak tesashi aita liasü. Iba sülen 2020 aser 2021 nung tamangba yimsü mezüingmeshir ama caricatures menüingba mechi azüdokshia longkak ait aser iba mapang police aika tepset.

Punjab sorkari shisa agütsüba nung ajemdaker taoba mapanga federal sorkari TLP

ANOGO ABEN TSÜNGREM DEN

Alima shisa shir dang nungi parnok shisa takaba liasü

Item shisatsü balaka liasü.
Tsüngremer shisa taka nisungji alima shisatsü nisung dang nungi balaka. Parnok nungi petinu samar külen, shisa kartemi tasen chuba indang kong soa lir tali asüingdangtsü mulungtet. Atangji parnok dang tasen Chubaji Yirusalem angutsü ta shir alitsü. "Yihuda nunger Chubaji kong soa lir," ta asüingdanga parnok aru (Matt. 2:2).

Yirusalem nung alir ajaki tasen chubaji külemya alitsü ta parnoki bilemer alitsü südi. Saka yamaji masü liasü. Kodang Herodi iba osang angashi pa tipmatem (Matt. 2:3).

Yirusalem nung alir shingaia Messiah asobaji bilema mali asü. Kodang Herodi putirtemi dang tasen chubaji kong asotsüla ta asüingdang, parnoki Laishiba nung bushitsü tenzüik. Tejen Lai nung yimsü nung tesayurtemi Khristaji Yihuda nung aliba Bethlehem nung asotsü ta ratettsü (Matt. 2:5).

Saka item shia akartemi shitakba telangzübaji agütsü, yimsü nung lenirtemi parnok temetetba liaka parnoki kodanga Yisu majuru. Tezü lurtem aser putirtemji alima shisa akartem noksa lir. Parnok metet saka kecha meinyak! Anüdoklen nungi aruba nisungtemji shidakba Tsüngrem shisatsü akartem liasü. Parnoki Pa O amang aser langka inyak. Parnoki iba jagi mapa inyak. Parnok theologyji teradang, saka parnok tashi angabaji tabensa liasü. Laishibai ashir, petinu tesangwaji kong Yisu soa lir ibaji matong tashi parnok jakdang ao (Matt. 2:9). Tsüngremi parnok Kinü Khrista dangi ani. Kotaker shisatsüji teti alima shisatsü dang nungi temaba.

ya anti-terrorism laws kübok April 2021 nung nokdanga liasü. Ajisüaka Islamabad-i longkak aita aotsü aliba tembangtsü tezüingzüktep yangluba sülen Punjab sorkari mepishiba ama kasa küm November ita iba tenokdangba agiena liasü.

Sorkari iba party ketdangsürtem apuba ya mapang talangka nungi meinyaki aliba maparen inyakba lir, ta Khristanpur temeden asoshi nokdaker temi ashir.

TLP merena akumba ajanga linük tesem ajungalen Khristanpur aser Ahmadis anema tamangba yimsü mezüingmeshiba ken o benokba tali akum aser tekülem ki aser ano tekülem agiba tesem balala aser leper amakba tali akum.

Khristan anati tamangba yimsü mezüingmeshi ta tiazü nung tai tongloktsüba sülen August 2023 nung TLP züingsem noklang aika adenshia Jaranwala, Faisalabad District, Punjab Province nung tekülem ki aser Khristanpur ki aika raksatsü.

June 2024 nunga party züingsem temi Sargodha nung Khristanpur Nazeer Masih Gill zükset, shibai Quran rongdoktsü ta tiazü nung tai tonglokja liasü. Iba telok yagi Gill'er ki aser par kibongi lapoka aliba tsüingsem yangluba factory rongdoktsü. "TLP tentetba mapang nungi

par nükjidong ya tamangba yimsü mezüingmeshiba azüoktsü ozüing yanglua aliba tenüing nung azüdokshi agütsüba ya lir. Parnoki yimjak nung tamangba yimsü mezüingmeshir tekolak tangzüka yoktsü yimyim ayimer aser iba ozüing mashi lenmang nung amshiba anema ola adokba obendanger aser sorkar ketdangsürtem tepsettsü amokmerener," ta Khristan attorney kati ashi.

Iba party yagi obendanger mulungjang nung tetsübo aitdaktsür, anungji obendanger aikati tamangba yimsü mezüingmeshiba ken o nung tai tonglokja aliba indang jembitsü memulunger, ta ashi.

Tesüiba mapang TLP yagi police anema mapa tamajung inyaka longkak balala aitba mapang police aika takum samaogo. Tangbo sorkar teyari nung police temi iba party anema mera agitsü maongka lir, ta attorney yagi ashi.

TLP anema akhi mapang nungi mera tapet agir alitsüla sernung magi aru, ta Rwadari Tehreek mesüra Movement for Equality indang mendenpuba Samson Salamat-ia ashi.

Open Doors ajanga alima nung Khristanpur alitsü asoshi linük tamajungtiba 50 asadangba 2025 World Watch List nung Pakistan ya jenjang ti buba nung lir.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Toktep

(v) kasasa asütsü merang (Compete)

* Nisung ajaki tajungtiba jenjang atongtsü bilema toktep.

Toktsü

(v) yutsü, bener mao (left behind)

* Onoki kidang ki oset ajak toktsü.

OLONG PAITEP # 7306

	1				2	3			
4			5						6
						7			
	8								
	9			10			11		
						12			13
14									
						15			

TIPIEN		LANGTSÜNGLEN	
2. Sü jeplok	-(4)	1. ____ i	-(4)
4. O agi merenshi	-(5)	3. Kasa masü	-(6)
7. Ayongküüm li	-(5)	5. Nüchi masü	-(5)
8. Chiyungtsü mapang süiadok	-(4)	6. Tashi endok	-(5)
9. Tsüngrem den jembiba	-(9)	9. Langtem	-(5)
12. Saklok	-(4)	10. Anü malidang	-(6)
14. Samaba mebushitet	-(5)	11. ____ kibur	-(5)
15. Mejanga onü	-(5)	13. Tebur tembar tsüngda jatepba	-(4)
16. Tzü shiruru ka	-(4)		

OLONG PAITEP # 7305 TELANGZÜBA

TIPIEN :	LANGTSÜNGLEN :
1. Semtu, 3. Lepko, 5. Bilem, 8. Ulu,	1. Sayu, 2. Teb, 4. Kimong,
10. Tsüngpang, 11. Tesangwa,	6. Lungkak, 7. Milak, 9. Zünga,
13. Aoksa, 15. Putir, 16. Yipru.	10. Temopu, 12. Walu, 14. Ali.

NAI-A YA METETTER

United States kübok Philadelphia nung kinü tanur ka dak carbamoyl phosphate synthetase 1 (CPS1) deficiency ta ajaba metabolic genetic disorder keter asoba atema alima nung mezüngbuba CRISPR-based therapy agiogo. Children's Hospital, Philadelphia aser Penn Medicine külemi yaritepa kinü tanur temesen nung CRISPR-based therapy agi aser iba ya alima nung "first personalized DNA editing treatment" lir ta World Record Academy ajanga metetdaksüogo.

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Bishnupur nung child marriage anendaktsütsü campaign agir

Guwahati, October 21, 2025 (Agencies): Manipur kübok Bishnupur district nung tamangba yimsü tanishir ajaki tanurtem 'child marriage' nungi kümzüka ayutsü tezüngzüktep agiogo.

Iba sentong ajanga Bishnupur district nung "100-day intensive campaign" tenzüker aser iba ya tanur kiyimba noktangtsü atema agir.

Iba senden nung Bishnupur Deputy Commissioner Pooja

Elangbam menden liasü aser lai ashiba agi "District Administration ketdangsüba kübok New Life Foundation ajanga iba campaign len anitsü." Iba campaign ya November 1, 2025 nungi January 26, 2026 tashi alitsü ta DC Pooja Elangbam-isa ashi.

"Tanur asüidang kibong akümba ya ozüngi memelar aser majung. Nisung ajaki iba osang prokshitsüla aser tanur asüidang kibong küm daksüba

anendaktsütsü ayongzüksüla" ta Elangbam-isa ashi.

Laisa nübortem dang Bishnupur ya child marriage-free district ka küm daksütsü ayongzük.

Manipur kübok valley district tem nung child marriage cases 100 shi liasü ta district-level data ajanga ashir.

Iba nung Thoubal district nung tatalokba 49 aser iba sülen Imphal West, Imphal East o Bishnupur nung liasü.

HITO-i Amit Shah dang arrtsü atema tebang aitsü ayonger

Guwahati, October 21, 2025 (Agencies): Hynniewtrep Integrated Territorial Organisation (HITO)-i Union Home Minister Amit Shah dang Assam-Meghalaya arrtsü mangatetep asoshi tebang aittsü ayongzükogo.

Parnoki Meghalaya Governor ajanga Amit Shah dangi memorandum ka yokogo. Iba nung Assam sorkari mapang shia Khasi Hills Autonomous District Council ajanga ketdangsüba tesemtem atsünga agiba shia lir.

Assam ketdangsürtemi

anogoshia timtem agütsür, kiojen raksatsür aser arrtsülen aliba yimtsüngtem nung alirtem libaliro asoshi tetsükdaksü bentsür arur ta HITO-i ashi.

2009 Langpih massacre aser 2022 Mukroh firing ajanga sorkari yaria tashiyim inyakba kulitem agütsür. Assam-i regional agreements aser historical boundaries senzüka yutsür ta parnokisa ashi.

Karbi lisopurtemi yaria Assam ketdangsürtemi tawa tu Meghalaya nunger aluyimertem nem tsük merohdaksü ta HITO-isa tai tongloksü.

Arrtsü atsünga agiba ajanga arrtsülen alirtem rongsenketzüng tsütsü timtemer ta parnokisa ashi.

Assam Chief Minister Himanta Biswa Sarma-i taoba nung tensa süngjemdaksütsü ta nangzükaka Karbi telungpur teloktemi yimdaklirtem maneni merenshir ta HITO-isa metetdaksü.

HITO-isa Centre sorkar dang Instrument of Accession and Annexed Agreement of the Khasi States kübok lateta aliba onüktem akhümtsübuttsü ayongzükogo.

Kiyir benjung ajanga Unitarian aser Niamtre tamangba yimsütem longjemer

Shilling, October 21, 2025 (Agencies): Meghalaya kübok West Jaintia Hills nung tamangba yimsü khenyongi balala ana-Unitarian aser Niamtre tsüngda kiyimba kulizüng agiogo aser iba ya tamangba yimsü anaprong nungi lennirtemi temoatsü agüja agiba mezüngbuba kiyir benjung lir.

October 20, 2025 nü Khasi matrilineal system kübok Unitarian Church nung Rev Derrick P Pariat aser Niamtre religious leader Pa Daloi Purmon Kynji nati iba kiyimba sentong ketdangsüa agiogo.

Tetsürta tebu ya Rev HH Mohrmen lir aser pa ya Jowai nungi Unitarian minister ka lir.

"Iba ya otsütsütsü mapang ka lir aser iba ajanga nüjiso aser külemi liyonga aoba tangatetba kuli agütsür" ta pai ashi.

"Linük kübok tangalen tamangba yimsü balala tsüngda kibong akümba magizüker mesüra tamangba yimsü melentsü rongshir saka iba ajanga tamangba yimsü ajanga asenok tsüngda telemsa masü saka telongjem adokdaksür ta nenshir" ta Rev HH Mohrmen-isa ashi.

Khasi Hills nung Unitarianism ya putu 19 buba tashi lua lir. Hajom Kissor Singh-i missionary orthodoxy magizüki movement ka tentetba aser Khasi-Jaintia

tesentaktep den reason, moral living, aser equality loktep.

Tetsürta kibong amangba Niamtre tamangba yimsü ya Tip Briew, Tip Blei - "Know Man, Know God" ajanga anir.

"Tamangba yimsü balala ta asüba onük tilateri madak temeimi takok anguba angudang kanga pelar" ta Heirtami Paswet-i ashi.

Jaintia Tribal Council nung Voice of the People's Party züngsem Deiwi Tariatong Tongper-ia "iba sentong ya asen loklibai kanga dang nüngdakba lir. Tatem nungbo temeimisa takok angur. Tsüngremi tena moajangma" ta ashi.



Pasighat East MLA Tapi Darang-i Gogo area nung de-Addiction-cum-Rehabilitation centre ka lapoktsüadang agiba noksa ka angur. Iba centre ya East Siang District kübok Tode village Char-ali anasa lir aser 'The Sober Society' ajanga repranger. Iba NGO yagi drug free environment atema inyaker.

Sanae Takaichi-i otsü yanglua Japan ato kilonser kumogo



Tokyo, Oct. 21, 2025 : Japan yimtiba Tokyo nung aliba House of Representatives nung ato kilonser menden asoshi October 21, 2025 nü toktepba nung Sanae Takaichi (tiyong)-i takok ngur nokdaka aliba noksa nung angur. Sanae Takaichi ya Japan nung tang yimsü tesüdak Liberal Democratic Party indang lenir lir, aser lai Mongulbarnü linük ato kilonser inyaktsü shimba ajanga linük asoshi tetsürtem rongnungi PM mezüngbuba akumer.

Tokyo, Mongputeni/Oct. 21 (Agencies): Sanae Takaichi ya parliament ajanga Japan indang ato kilonser shimogo, anungji linük nung iba mapa inyaktertem rongnung tetsür mezüngbuba la akumer.

Arishi küm 64 tain Takaichi-i ruling Liberal Democratic Party (LDP) lenir ama Mongulbarnü Lower House nung votes 237 angu aser Upper House nung votes 125 ngua liasü.

Conservative bhukumer aser taoba UK PM asür Margaret Thatcher sakloker Takaichi-i Japan rongsenketzüng tebilemtsü tulu agizüker.

Ibai alima nung rongsenketzüng tsütsü tematiba jenjang pezü buba nung aliba linük asoshi tarutsü tia mejangjai aruba mapang ka lir. Küm pongu tsüngta la ya ato kilonser pezü buba alitsü, aser la jakdang inyaktertem anojungi PM menden nungi alu.

October ita tetenzüklen LDP asoshi toktepba nung lai tebur pezü tsükdakjaka, LDP den mapang talangka nungi coalition

partner ama aruba Komeito party ainshiba ajanga iba mapa inyaktsü asoshi la indang lenmang nokdang ama liasü.

Ajisüaka mapangtong nung opposition party Japan Innovation Party (JIP) den tezüngzüktep ka yangluba ajanga la kumzük. La aser LDP yagi 2028 küm voters ajurutsü.

Linük telungzük nung mepetmesü aliba yutsür bendang linük den tesendaktep nunga teshisadangtsü lir. South Korea-i Japan den tesendaktep yanglushi, saka la right-wing politics mechi tebilemtsü akar. Aser taoba ato kilonser asür Shinzo Abe densema la jakdang inyaka alir kar ama, la-ia China dak tenük yoker.

Saka tongtipangtiba tesendaktepji US ya lir aser taruba hopta US Tir Donald Trump den ajuruteptsü lir.

Tariff tsütsü tangatettep kati arua lir, saka Trump-i taoba mapang security treaty nung temulung masüba indang jembia lir aser Tokyo dang defence atema sen timba indoktsü akhangba ajanga tebilemtsü tuluba akumer.

Arishi küm 64 tain Takaichi ya Japan nungi yimtenren nung tejak tasen masü.

La ya Abe tembar liasü, aser taoba mapang minister mapa balala inyakdanga lir aser PM atema toktepa lir.

Midterm elections nung taoba lenir aser PM Shigeru Ishiba-i tamakok ajurua mapa yutsüba sülen la ya LDP lenir ama shim.

Lai tawa nübuyimba mapang tetsür asoshi hospital services ulushitsü aser kilung nung yariteper nem teyari agütsütsü nangzüka lir. Ajisüaka la asoshi mapa tulutibaji, nüburtemi LDP dak tamang kataktsütsüba ya lir.

Russia-i Ukraine indang energy infrastructure tem maneni amaker

Kyiv, Mongputeni/October 21 (Agencies): Russia-i energy infrastructure tem amakba ajanga Mongolbarnü Ukraine kübok Chernihiv tesem nung nüburtem meyirejang aika power makai aküm aser karbo tzüa dena maka aküm, ta ketdangsürtemi ashi. Kasa mapang nung drone tem maneni yimzua aliba ajanga infrastructure tem yanglushitsü tetsükdaktsü adoker, ta ketdangsürtemisa metetdaktsü.

Energy ministry-i ashiba agi, iba tesem yimtiba Chernihiv aser province north len electricity supply kecha maka kümogo.

Russia-i ano kidanger Sumy tesema makogo, koba asükwa atongtsü lia Russia-i Ukraine indang energy grid tem maka aruba rongnung tesüsabuba asütsü.

Chernihiv tesem kong rara metenzük tsüngda nütsüngyongsük million ka majung liasü, iba tesem nung power infrastructure tem Russia-i hopta ishika tsüngda drone aser missile amshia kanga mejungi makdar, aser iba ajanga nüburtem power agi anünga anogoshi inyakyim nung tetsükdaktsü ajangshidar.

"Russia-i drone amshia maneni amakba ajanga Chernihiv tesem nung

emergency crew temi power supply meyanglushiteti arudar," ta energy ministry-i Telegram ajanga metetdaktsü. Ministry-isa, Russia-i raksar aliba facility tem kolak nung drone tem maneni yimzua toktsüba atema parnok aitsüogo, kechiyong iba ajanga osettsüt raksar aliba meyanglushiteti aser humanitarian crisis atsülangdaktsü.

Iba osang agütsüba sülen ghonda ana shi lir Tir Volodymyr Zelenskiy-i Telegram ajanga facility yanglushi tenzükogo ta metetdaktsü. "Russia nunger tasaji temekong agi nisungtem tepsettsü aser amokmerentsü atema lir," ta pai ashi.

"Putin-i yimjung atema sensaksemtsü asoshi renema lir ama sayur, saka Russia-i drone aser missile amshia maneni Ukraine amaker," ta Foreign Minister Andrii Sybiha-i X nung zülutsü.

"Temekong tsüngküm asüloka aruba mapang tesem aika nung nüburtem power makai toktsüogo aser karbo tzüa makai lir," ta paisa shisem.

2022 küm Ukraine amak tenzükba sülen Russia-i Ukraine indang energy facilities tem maneni maka arudar aser ashiba agi item ya rara nung military target tem lir.

Myanmar military-i scam centre nung nisung 2,000 dak tema apu

Yangon, Mongputeni/October 21 (Agencies): Myanmar military-i ashiba agi, Thailand den arrtsü nung KK Park nung amenoka aliba scam centre ka meita aoba mapang nisung 2000 dak tema puogo.

Iba tesem ya ozüng alema gambling, money laundering, online romance aser investment scam tem atema

international criminal syndicates temi amshia liasü, ta Myanmar Alin daily-i metetdaktsü.

Iba ochi mashi inyakyim ya ki 250 dak tema nung amendaker inyaka liasü, ta media sangdong ajanga metetdaktsü. Kitem rongnung warehouse, dokan aser storey ka ana kitem densema liasü.

Meita aoba mapang military-i Starlink satellites 30 puogo, ta Myanmar Alin-i ashi.

Iba satellite ya Elon Musk meyong SpaceX indang subsidiary company Starlink-i yanglur aser achaayanger aser power maliba mapang nunga internet agi sendaktepa toktsüteter.

Ketdangsürtemi nisung 2,198 puogo, kong tetsür 445, tebur 1,645 aser tebur security guard 98 densema lir. Ajisüaka item nisungtem ya koba linük nungisa iba indang osang tejangja magütsü.

KK Park ya Kayin State kübok Myawaddy jila nung lir, koba Thailand nung Mae Sot jila den ayong agi dang pilar lir.

Iba tesem nung People's Defence Force aser telungpur

telok balala den Myanmar military rara arudar

2021 küm military-i sorkar atsüngba sülen Myanmar tang tashi mepetemsü nung lir aser military o telungpur telok balala tanen maka raradar.

Military otongdar Major-General Zaw Min Tun-i Hombarü ashiba agi, military den rara aliba telok rongnung ka; Karen National Union nungi lenirtem KK Park nung iba scam project tem nung densema lir, ta Associated Press news agency-i metetdaktsü.

Iba scam centre inyakyim azüoktsü atema Thailand aser China nati Myanmar nongshia arudar. Iba centre ajanga ozüng alema inyaksangshirtem aser talisa China nunger syndicate tem atsüa aruogo.

Thai police-i ashiba agi, Thai-Myanmar arrtsü kija nunga scam operation tem nung nisung 100,000 inyaka alitsü.

Taoba küm pongu tsüngda Southeast Asia nung scam centre tem prokshiaogo, saka Myanmar aser Cambodia na ya teyongtsü lir.



Israeli settlers temi West Bank nung Bethlehem yimti anasa Jabaa yimtsüng nung rongdoktsür aliba gari ka Palestine nunger kati reprangdangba noksa nung angur. Israeli settlers temi Jabaa yimtsüng nungi Palestine nunger indang gari aika Deobarnü rongdokja liasü.

Mkg nung Imchaba Master Memorial Nagaland Open Volleyball Trophy asayar



Mokokchung, Mongputeni/October 21 (TYO): Ajaki yongyaseta ataba 18 buba Imchaba Master Memorial Nagaland Open Volleyball Trophy 2025, Mokokchung District Education Officer, Sentinenla-i yangi Multi-Purpose Sports Complex, Mokokchung nung meraketa tenzüksüogo. Iba asayamung ya Mokokchung District Volleyball Association (MDVA)-i küm ana nung khi ayongzüka akar.

Asayamung tenzüka mezüing asaya Pool 'A' nungi 2023 defending champion MH-10, Kohima aser 2023 nung tasembuba jenjang angur Chienino Brothers Kiruphema 'A' na best-of-three yimya nung asayaba, MH 10-i iba asaya rangben amokbanga points 25/16 & 25/18 agi straight sets nung Chienino Brothers madak takok angu.

Taküm iba asayamung nung

Nagaland tesem balala nungi telok 14-i shilem agitsü tenüing zülüok saka Pool 'B' nungi Southern Angami Sports Association pur marutet, anungji, telok 13 dang asütsü. Iba asayamung ya 24th October, 2025 tashi asaya-a amungtsü sentong renema lir.

Taküm iba asayamung nung takoker nem sen ? 1 lakh, tanabuba nem ? 70,000, tasembuba nem ? 30,000, aser pezübuba nem ? 20,000 ta senpettsütsü. Nija senpet (individual prizes) - Best Spiker, Best Setter, aser Player of the Tournament shima parnok nema sen meyi pungu-ngu (?5,000 each) senpettsütsü, ta tayongertemi metetdaksüogo.

Tetushi tesemdanger, Sentinenla-i iba asayamung laokja jembidang, MDVA-i tera tashi ia saisabong jenjang ajungkettsü nukla tajung yur iba asayamung metitemi ayonga aruba asoshi pelaba den

saisabong ajanga tazüokba, telungjem aser lenisüba adokdaksür, anungji, lanurtemi saisabong tsütsü temulung agütsütsü ajungshia liasü. Laisa shilem agirtem dang jangrabangraa, ochishia aser saisangbonger yimya benshia asayatsü asoshi ayongzüik.

22nd Oct nü asayatem yamai alitsü - nikongdang 1:00 ako nungi tenzüka 4:30 tashi ka asayatsü. Aji sür, ghonda ka anisüngzüik agir (break agir) ano aonung 5:30 ako nungi 10:00 tashi asayatsü. 23rd Oct nü match ji nikong 2:00-4:00 tashi ka asayatsü aser ghonda ka anisüngzüik aonung 5:00-7:00 aser 7:30 - 9:30 tashi asayatsü. 24th Oct nüji semifinal match nikongdang 1:00-4:30 tashi asayatsü. Aji sür, tasembuba aser pezübuba jenjang asoshi aonung 5:00 nungi saitsü aser final match ji aonung 7:30 nungi asayatsü sentong renema adoka lir.

AIFF-i U-17 India tetsür team nem USD 25000 agütsütsü nangzük

Mongputeni/October 21, 2025 (Agencies): AFC U17 Asian Cup atema qualify sütetba sülen All India Football Federation (AIFF)-i Mongolbarnü sangdong ka ajanga U17 India tetsür team nem senpet USD 25,000 agütsütsü nangzükogo.

India team-i taoba hopta Bishkek nung Kyrgyzstan aser Uzbekistan na goal 2-1 agi koka liasü. Asaya ana ya akokba sülen parnoki point trok ngua Group G nung temaba jenjang nung tembang, aser taruba küm China nung asayatsü aliba AFC asayamung atema qualify süogo. U17 team tang mezüingbuba iba asayamung nung asayatsü atema qualify süogo.

"India U17 tetsür national team-i kanga junga asaya-a tang mezüingbuba AFC U17 Women's Asian Cup atema qualify asüba sülen parnoki nem senpet USD 25,000 agütsütsü

All India Football Federation (AIFF)-i pelashishia sangdonger," ta linük nung football achayangba lokti tentet yagi metetdaksü.

India team tesüsa 2005 küm U17 Women's Asian Cup nung asaya, saka iba mapang asayamung atema qualifier masaya.

Kasa mapang nung AIFF-i, U17 team takok asoshi maparen balala benoka inyakba indang metetdaksü.

"Federation-i sentong kanga junga yangluba ajanga India U17 tetsür team-i iba asaya ana kanga junga asayatetogo. Iba team ya taoba season Indian Arrows Women Juniors ama IWL 2 nung senior asayartem den asaya aser iba ajanga parnok nem tajangshiba tajung aika agüja liasü," ta AIFF-i ashi.

Iba asaya ya grassroots level nungi akangshidaksütsü atema federation rangloker inyakdar.

"Inyakyimtem rongnung

ASMITA Women's Football League ya ka lir, aser iba kübok 2023 nungi 2025 tashi nung linük kübok tesem balala nung U13, U15, aser U17 jenjang nung league 155 takok ngua ayongzüka asayaogo.

"2023-24 küm iba asayamung nung junior asayar 6,305-i shilem agi aser 2024-25 nungbo asayar 8,658-i shilem agia liasü. ASMITA Football League ya 2025-26 season nunga maneni asayadar aser U13 ASMITA Football Leagues 2025-26 taoba ita tenzüko," ta AIFF-isa metetdaksü.

U13 league nung asayamung 50 asayatsü, kong state 26 nungi asayar 8000 shi aser team 400-i shilem agitsü.

"Iba amala inyakyim benoka inyakba ajanga India nung züngoksema aliba tetsür football asayar 2020 küm 8,683 aliba 2025 kümbo 37,829 jungogo," ta kasa sangdong ajanga metetdaksü.

27 Buba MDFA Trophy tananü buba Quarter Final Osang Mokokchung, Mongputeni/October 21 (TYO) : Tanü Imkongmeren Sports Complex Mokokchung nung 27 Buba MDFA 3rd & 4th Quarter Final asayaogo.

Tanü 3rd Quarter Final asaya Telongjem FC aser Sports Spociety Soyim tsüingda asaya aser iba asaya nung Match Patron Mokokchung Municipal Council nung Councillor Wb.Wabang Kichu liasü. Iba asayabtenzüker minute 5buba nungTelongjem FC nungi J.no-9 Tarepnungsang-i goal-1 yok, ano minute 34buba nungTelongjem FC nungisa J.no-19 Thejasetuo 'B' Jwrle-i goal-1 yocket aser iba sülen par telok takoklensür anisüngzüikba mapangb agi. Telok ana tanaben ground-i aita asayadang ano minute 49buba nungTelongjem FC nungi J.no-9 Tarepnungsang-isa goal-1 yocket aser anoTelongjem FC nungisa minute 60buba nung J.no-5 Vitohi Kiho-ia goal-1 yocketaTelongjem FC-i Sports Society Soyim 4-0 agi kokteta MDFA Trophy Semi Final asayatsü maongka ngutetogo.

Chargers FC aser Thunder Bolt FC tsüingda pezübuba Quarter Final asayanung Match Patron Junior Engineer RD, Chuchuyimlang Block Wb.Moatemsü liasü. Chargers FC nungi J.no-16 Takotoba-i minute 5buba nung goal-1, minute 11aser ano minute 24buba nung J.no-7 Longkhai-i goal-2 tongkonga yok aser minute-31 buba nung J.no-15 Yangersosang-i goal-1, idakja par teloktakoklensür anisüngzüikba mapang agi.

Tanaben ground-i aita asayadang minute 68buba nung J.no-7 Longkhai-i goal-1yocket ano kasa telok nungisa minute 7 buba nung J.no-10 Osen-i goal-1 ta yocket aser ano minute 75 buba nunga J.no-9 Tongpangnokdang-ia goal-1 yocket nung item goal-7 jagi Chargers FC-i Thunder Bolt FC SC ayongayonga koktetaMDFA Semi Final asayatsü jenjang ajangzüktetogo.

27 MDFA Trophy

22-10-2025 Semi Final Fixtures
1st Semi Final, 1:00 noon :
Super Seniors FC Vs
Doyang Strikers MKG

Manager Kompany-i Bayern Munich den tenangzüktepba yanglushi

Mongputeni/October 21, 2025 (Agencies): Bayern Munich manager Vincent Kompany-i club den küm ana atema tenangzüktepba yanglushiogo. Pa iba club nungi 2029 küm June ita tashi inyaktsü.

Taoba mapang Manchester City nungi nüngtugu asayar ya 2024 küm May ita iba Bavarian club indang coach aküm aser pa den tenangzüktepba yangluba 2027 küm lemluwa tembangtsü liasü.

Arisi küm 39 tain Belgium nunger coach lenisüba nung Bayern puri taoba season Bundesliga title aben aser parnoki tetoktepba ajak nung asaya 67 nungi 49 koka liasü.

"Ni kanga pelar aser Bayern-i kü dak tamang akaba aser mezüingbuba anogo nungi mapa inyaktsü atema environment tajung ka agütsüba atema kanga pelar," ta Kompany-i ashi.

"Ni idaki mapang talangka inyaker ama aser club ya kanga junga meteta lir ama bilemer. Tang tashi nung tajangshiba kanga junger," ta paisa shisem.

Bayern puri 2025-26 season ya German Super Cup koka tenzüik aser parnok Bundesliga nung tanabuba jenjang nung aliba team dang nungi point pongu agi timba lir.

"Vincent Kompany-i tang

tashi nung kanga junga inyakba aser Bayern nung maneni junga inyaka aotsü temaitsü tejangja sayuba ajanga pa den tenangzüktepba yanglushiogo," ta club tir Herbert Hainer-i ashi.

"Vincent ya asayartem, club management aser fan temi kanaga tushir. Pa den jelia maneni sendaktepa inyaktsü asoshi tenangzüktepba yanglushiba atema pelar," ta paisa ashi.

Manchester City nungi takok marok aika bena asayaba mapang Kompany ya nüngtugu aküm. Pa city indang captain liasü aser pai club nungi asaya 360 nung asaya aser iba mapang Premier League title pezü bena liasü.

Pa coach mapa ya mezüingbuba pa lanuwa asayaba club Anderlecht nung 2019 küm player-manager ama inyak aser pa asaya nungi anenba sülen 2020 küm club indang coach mapa ya full time agizüka liasü.

Pa lenisüba nung iba club yagi league titles ana aben aser iba sülen 2022 küm pa Burnley manager asütsü shim.

Burnley nung inyakba mapang mezüingbuba season nung parnoki Championship akok aser PL-i promote asü, ajisüaka parnok 19buba nung tembangba sülen Premier League nungi relegate süatok.

BIEMDANGANG

"Pei sasa ashioktsütsüsa bo bendanga tagütsüma."